



VENDIM

Nr. 825, datë 23.11.2016

**PËR RISHPËRNDARJEN E FONDEVE,
BRENDA PROGRAMEVE, NË
BUXHETIN E VITIT 2016, MIRATUAR
PËR MINISTRINË E PUNËVE TË
BRENDSHME**

Në mbështetje të nenit 100 të Kushtetutës, të shkronjës “a”, të nenit 44, të ligjit nr. 9936, datë 26.6.2008, “Për menaxhimin e sistemit buxhetor në Republikën e Shqipërisë”, të ndryshuar, dhe të nenit 17, të ligjit nr. 147/2015, “Për buxhetin e vitit 2016”, të ndryshuar, me propozimin e ministrit të Punëve të Brendshme, Këshilli i Ministrave

VENDOSI:

1. Në buxhetin e vitit 2016, miratuar për Ministrinë e Punëve të Brendshme, bëhet rishpërndarja e fondeve, brenda programeve buxhetore, si më poshtë vijon:

a) Për programin “Policia e Shtetit”, në artikullin 231 “Shpenzime për investime”, shtohet fondi 63 000 000 (gjashtëdhjetë e tre milionë) lekë, për mbulimin e shpenzimeve në investime për projektin “Sistemi i transmetimit të të dhënave DATACOM”;

b) Për programin “Emergjenca Civile”, në artikullin 602 “Mallra e shërbime”, shtohet fondi 14 400 000 (katërmëdhjetë milionë e katërqind mijë) lekë për mbulimin e shërbimeve të kryera në territorin e Republikës së Shqipërisë për fikjen e zjarreve në pyje gjatë muajit gusht-shtator 2016.

2. Fondi prej 77 400 000 (shtatëdhjetë e shtatë milionë e katërqind mijë) lekësh, i përcaktuar në shkronjat “a” dhe “b”, të këtij vendimi, përballohet nga pakësimi i buxhetit për programin “Gjendja civile”, zëri “Shpenzime për investime”, dhe për programin “Planifikim menaxhimi”, zëri “Shpenzime korrente”.

3. Ngarkohen ministri i Punëve të Brendshme dhe ministri i Financave për zbatimin e këtij vendimi.

Ky vendim hyn në fuqi menjëherë dhe botohet në Fletoren Zyrtare.

KRYEMINISTRI
Edi Rama

VENDIM

Nr. 826, datë 23.11.2016

**PËR NJË NDRYSHIM NË VENDIMIN
NR. 418, DATË 27.6.2012, TË KËSHILLIT
TË MINISTRAVE, “PËR PËRCAKTIMIN E
MASËS SË SHPËRBLIMIT TË
ANËTARËVE TË KËSHILLAVE,
BORDEVE OSE KOMISIONEVE TË
NJËSIVE TË QEVERISJES QENDRORE”,
TË NDRYSHUAR**

Në mbështetje të nenit 100 të Kushtetutës dhe të nenit 4, të ligjit nr. 10405, datë 24.3.2011, “Për kompetencat për caktimin e pagave dhe të shpërblimeve”, me propozimin e ministrit të Financave, Këshilli i Ministrave

VENDOSI:

1. Në lidhjen nr.1, të përmendur në pikën 3, të vendimit nr. 418, datë 27.6.2012, të Këshillit të Ministrave, të ndryshuar, në ndarjen “Ministria e Transportit dhe Infrastrukturës”, për emërtesat “Komiteti Kombëtar i Digave të Mëdha” dhe “Këshilli Teknik i Përhershëm i Digave”, numri maksimal i pagesave në një vit buxhetor bëhet 12.

2. Efektet financiare të përballohen nga buxheti i miratuar për Ministrinë e Transportit dhe të Infrastrukturës.

Ky vendim hyn në fuqi pas botimit në Fletoren Zyrtare.

KRYEMINISTRI
Edi Rama

VENDIM

Nr. 827, datë 23.11.2016

**PËR NJË SHITESË NË VENDIMIN NR.
538, DATË 26.5.2009, TË KËSHILLIT TË
MINISTRAVE, “PËR LICENCAT DHE
LEJET QË TRAJTOHEN NGA APO
NËPËRMJET QENDRËS KOMBËTARE
TË LICENCIMIT (QKL) DHE DISA
RREGULLIME TË TJERA NËNLIGJORE
TË PËRBASHKËTA”**

Në mbështetje të nenit 100 të Kushtetutës dhe të neneve 15 e 36, të ligjit nr. 10081, datë 23.2.2009, “Për licencat, autorizimet dhe lejet në Republikën e Shqipërisë”, të ndryshuar, dhe të neneve 48, 51, 75, të ligjit nr. 93/2015, “Për turizmin”, me



propozimin e ministrit të Zhvillimit Ekonomik, Turizmit, Tregtisë dhe Sipërmarrjes, Këshilli i Ministrave

VENDOSI:

Në vendimin nr.538, datë 26.5.2009, të Këshillit të Ministrave, bëhet shtesa si më poshtë vijon:

1. Pas fushës XII shtohet fusha XIII, me këtë përmbajtje:

“FUSHA XIII

TURIZMI

KATEGORIA XIII.1

AGJENCI UDHËTIMI DHE/OSE

OPERATOR TURISTIK

I. NDARJA E KATEGORISË DHE RREGULLA TË PËRGJITHSHME

1. Veprimtaria “Agjenci udhëtimi dhe/ose Operator turistik” është kategoria XIII.1, e shtojcës së ligjit nr. 10081, datë 23.2.2009, “Për licencat, autorizimet dhe lejet në Republikën e Shqipërisë”.

2. Kategoria e kësaj veprimtarie ndahet në dy nënkategori, si më poshtë vijon:

a) “Agjenci udhëtimi”, me kodin XIII.1.A;

b) “Operator turistik”, me kodin XIII.1.B.

3. Licencat e të dy nënkategorive janë pa afat.

II. LICENCIMI I VEPRIMTARIVE TË NËNKATEGORISË XIII.1.A

1. Kriteret e posaçme të licencimit, si dhe llojet e dokumenteve provuese e shoqëruese përkatëse, për nënkategorinë A, jepen në tabelën 1, më poshtë:

Tabela 1

Kriteret e posaçme	Mbi çfarë faktorësh veprimtarie dhe/ose specifikash e specialitetesh aplikohen kriteret e posaçme	Llojet e dokumenteve provuese lidhur me kriteret e posaçme
Përshtatshmëria e njohurive dhe eksperiencës së personelit.	a) Drejtuesi teknik b) Përfaqësuesi ligjor (administratori)	a) Certifikatë për drejtuesin teknik ose përfaqësuesin ligjor; b) Akt që provon marrëdhëniet e kërkuara të punës për drejtuesin teknik; c) Vërtetim të gjendjes gjyqësore për përfaqësuesin ligjor (administratorin) për 5 vitet e fundit.
Përshtatshmëria e pajisjeve, teknologjisë dhe mjediseve me standardet e shërbimit.	a) Mjediset	Sipas rastit: dokumente pronësie dhe/ose përdorimi, si dhe/ose dokumente që pasqyrojnë cilësitë e garancitë e këtyre faktorëve.

2. Licencimi i veprimtarisë së nënkategorisë A bëhet sipas grupit II.

III. LICENCIMI I VEPRIMTARIVE TË NËNKATEGORISË XIII.1.B

1. Kriteret e posaçme të licencimit, si dhe llojet e dokumenteve provuese e shoqëruese përkatëse, për nënkategorinë B, jepen në tabelën 2, më poshtë:

Tabela 2

Kriteret e posaçme	Mbi çfarë faktorësh veprimtarie dhe/ose specifikash e specialitetesh aplikohen kriteret e posaçme	Llojet e dokumenteve provuese lidhur me kriteret e posaçme
Përshtatshmëria e njohurive dhe eksperiencës së personelit.	a) Drejtuesi teknik b) Përfaqësuesi ligjor (administratori)	a) Certifikatë për drejtuesin teknik; b) Certifikatë për përfaqësuesin ligjor (administratorin); c) Akt që provon marrëdhëniet e kërkuara të punës për drejtuesin teknik; ç) Vërtetim të gjendjes gjyqësore për përfaqësuesin ligjor (administratorin) për 5 vitet e fundit; d) Dokument që vërteton eksperiencën e mëparshme në këtë fushë të drejtuesit teknik dhe përfaqësuesit ligjor (administratorit).
Përshtatshmëria e pajisjeve, teknologjisë dhe mjediseve me standardet e shërbimit.	a) Mjediset	Sipas rastit: dokumente pronësie dhe/ose përdorimi, si dhe/ose dokumente që pasqyrojnë cilësitë e garancitë e këtyre faktorëve.

2. Licencimi i veprimtarisë së nënkategorisë bëhet sipas grupit II.

IV. DATA E FILLIMIT TË LICENCIMIT SIPAS KËTIJ VENDIMI

Data e fillimit të licencimit të veprimtarive të kategorisë XIII.1 është data e hyrjes në fuqi e këtij vendimi.”.

Ky vendim hyn në fuqi pas botimit në Fletoren Zyrtare.

KRYEMINISTRI
Edi Rama